

HEADLINES (EVENING)

1. Health Department chuan Aizawl khawpui chhung veng hrang hrangah Dengue a hluar thu an sawi a, mipuite fimkhur turin a chah.
2. Mamit district chhung inkalpawhna kawng chhe lutuk siam that nawr nan Mamit khaw daia National Highway 108 dan chu ni 2 dan a ni ta.
3. Defence Minister Rajnath Singh chuan vawiin khan Hindustan Aeronotics siam Tejas LCA MK1A fighter jet hmasa ber a tlangzarh
4. Vawiin khan Gujarat sawrkar cabinet tharah Deputy Chief Minister atan Harsh Sanghvi lakluh a ni.

<><><>

DENGUE

Health Department hnuiaia State Vector Borne Disease Control Programme-chuan Aizawl khawpui chhung veng hrang hrangah Dengue a hluar thu an sawi a, he natna hi thihpui theih a nih avangin mipuite fimkhur turin an chah a ni.

Health Department hotute chuan, tunhnaiah Aizawl khawpui chhung veng hrang hrangah Dengue natna a hluar mek thu sawiin SVBDGP, veng hrang hranga Local Council leh AMC Corporator tang ho hmalaknain Dengue do beihpui thlak mek a ni an ti a, thosi pianna tihbo hnattlang leh khaw hmanga thosi kah, fogging neih thin a ni a, Fogging hi veng 5 - Armed Veng South, Armed Veng, Saron Veng, Chhinga Veng leh College veng-ah neih tawh niin, nimin khan Zarkawt leh Tuithiang-ah neih tan leh a ni.

Health Department hotute chuan, kuminah ruahtui a tlak rei avangin Dengue thosi pian theihna tuitling a tam avangin Dengue natna hi a hluar phah niin a lang an ti a, Dengue natna awm duh hun lai a nih bawk avangin mipuite fimkhur turin an chah a. Dengue natna laka inven nan an in leh a vela thosi pian theihna pangpar pot-a tuitling, tyre chhia, dispo cup, bottle ruak ang chi tibo tur leh thosi thahna hlo chhit chi hmang thin turin an chah a. Dengue pai thosi chuan mi pakhat seh a duhtawh mai loa, am bul hnaia awmte a sehkuah thin avangin thosilantha taka zar thin turin an chah a. Dengue chu thihpui theih natna a nih avangin, he natna vei ni-a inrinhhlel te chu thisen endik tir vat tur leha rang thei ang bera Doctor pan turin an chah a, Veng leh khua Dengue natna hmuhchhuahna hmun chu a rang thei ang bera Health Department thawktute hrilh turin an chah a ni.

<><><>

CM

Chief Minister Pu Lalduhoma'n 15th Finance Commission hun tawp lama an awm avang leh hna hmanhmawh thlak a tam avangin SASCI hna thenkhat chu restricted tender kalpui an phalsak tih a sawi. Aizawl Khatla Venga Working Women Hostel sakna tur lungphum a phum na ah he thu hi sawiin Chief Minister chuan 15th Finance Commission hun tawp lamah an awm avangin an fund hmuhte chu hmanhmawh taka kalpui a tul a, heng avang hian SASCI hna thenkhat chu restricted tender kalpui an phalsak a ti a, hmasawna hnathawhchu a hun taka zawh zel an duh a ti a, hnathawh tha revise ngailo an duh tih sawiin a viltu tur State Monitoring Committee an din tih a sawi.

Chief Minister chuan, SASCI 2024-25 Part X- ah Central sorkar chuan Working Women Hostel sakna tur a ruahman a, Mizoram cheng vaibelchhe 127 an hmu tih sawiin Hostel pasarih sakna tur an pawm a ti a, Khatla Working Women Hostel chu Mizo Hmeichhe Tangrualten kum tam tak Women Hostel an lo kalpui tawhna hmun a ni tih sawiin a building a upat tawh avangin sak that ani dawn tih a sawi.

Mizo Hmeichhe Tangrualte enkawl Khatla Women Hostel hi kum 1975 a Social Welfare Board, Government of India atanga pawisa hmuh hmanga sak a ni a. A tirah mi 30 awm theihna niin a hnuah central sorkar vekin sum a rawn pek belh hmangan an tilian leh a, mi 60 khawsak theihna a lo ni ta a, a thar sak a nih dawn tak avangin building hlui hi thiah a ni ta a. A satu tur hi Sky Builders, Zemabawk North an ni.

<><><>

MAMIT NH

Mamit district chung inkalpawhna kawng chhe lutuk siam that nawr nan nimin atanga Mamit khaw daia National Highway 108 dan chu vawiin khan chhunzawm a ni.

All NGO hruaitute leh Commercial Vehicle Owners Association hruaituten Mamit khawpui panna kawngpui hrang hrangte NH 108 - Mamit leh Aizawl, Mamit leh Hachhek tlang dung inkalpawhna leh NH 06 Mamit leh Bairabi inkar kawng chhe lutuk te siam tha turin sawrkar an lo ngen tawh thin a, an ngenna te tih hlawhtlin sak an nih loh avang leh kawng ala chhiat reng avang hian nimin zing dar 7 atang khan Mamit khawdaiah NH 108 (NH44A an tih baw) chu dan chah a ni.

All NGO hruaitute leh Commercial Vehicle Owners Association hruaitute chuan khawtlang mipui ten an harsatna tawh zawng zawngte chu vawi leh khatah siam that nghal vek theih nilo mahse sawrkar / department ten an duh anga kawngpui siam thatna hna thawk tura khawl leh hmanrua te lakhawm a hma an thawh hma chuan kawng dan pin chunzawm zel an tum thu leh Dampa AC MLA By election lo awm tur a lirthei vei vak te pawh dan zel an tum thu an sawi baw.

<><><>

TIPPER ASSN

Kolasib District Hqrs Mizoram Tipper Association chuan Bairabi leh Kolasib inkar leh Vairengte leh Sairang inkar kawngpui dinhmun an enfiah na ah kawngpui siam dan chu an duhkhawp lo tih an sawi.

Kawngpui dinhmun an enfiahnaah hian Mizoram Tipper Association Kolasib District Hqrs. hruaitute chuan, Bairabi leh Kolasib inkar kawngpui chu hmun tam takah khuar hlauhawm, hnawh that ngai a tam hle tih an sawi a, Kawnpui leh Sairang inkar kawngpuiah pawh hmun tam takah lirthei rit phurte tana chhiatna nasa zawk thlen theihna a la tam hle tih sawiin, vawiina kawngpui dinhmun an enfiah lai hian hnawhawktu awm baw mah se, kawng chhiat tawh dan nen khaikhinin an hnathawh chu a nep thu leh beitham an tih thu an sawi.

Mizoram Tipper Association Kolasib District Hqrs. hruaitute sawi danin, kawngpui hi NHIDCL hnuaia BR GOYAL Pvt. Ltd. in an siam a, kawngpui siamna tur hmanrua leh bungrua engmah an la chhawp lo va, kawngpui hi tun thal chhunga siam zawh hman an tum a nih chuan hmanrua inchhawp ngei ngei tawh turah an ngai tih sawiin, kawngpui hi tun thla ni 19 ral hma ngeia tlan nuam tawk taka an siam lo a nih chuan an kal zel dan tur an rel dawn tih an sawi a. Kawngpui hi tha taka siam vat a nih theih nan thuneitu ten a rang lama hma lak sak vat turin an ngen a ni.

<><><>

RD MINISTER

Rural Development Minister Prof Lalnilawma'n ni 100 inhlawhna chu thingtlang mipui tan rotling leh chhenfakawm anih theih nan ruahmanna tha zawk neih a tul thu a sawi. Vawiin khan RD&A Minister Prof. Lalnilawma hovin Rural Development and Administration Department a thawktu Mizoram hmun hrang hrang (District Rural Development Office leh Rural Development Block Office) a thawktute nen Ni 100 inhlawhna (MGNREGA) sum awmze nei zawk, chhen fakawm zawk leh khawtlang tana rotling siamna atan a hman a nih theih nan inrawnkhawmna hun neih a ni a, nimin atanga tanin vawiin khan zawh fel a ni.

He hunah hian Rural Development Block Office hrang hrang atangin mipui tana hna tha leh rotling, chhenfakawm zawk tur hna ruahmanna an neih te neih a ni. Prof. Lalnilawma chuan ni 100 inhlawhna kaltlangin hna tha taka thawh a nih theih nan tun aia nasa lehzuala inpek a ngaih thu a sawi a, Hnathawh leh ruahmanna siam te chu thingtlang mipui a bikin kuthnathawk tute tan a malsawmna a nih theih nan an ruahmanna siam chu chhuanawm khawpa thawh tum turin thawktute a chah a ni.

<><><>

ART & CULTURE

Art & Culture Minister Pu C. Lalsawivunga'n Zo hnahthlakte chu hmun hrang hrangah awm mahse insuikhawmna rilru pu chung a thinlunga inpumkhat zel tur leh Mizo nun zemawi vawngghima aia upa zah kawnga tan la zel turin a chah.

Vanghmun Khelmual, Jampui Hill, North Tripura a Cultural Meet a hmanpuina ah he thu hi sawiin Pu C. Lalsawivunga chuan Zohnahthlak hmun hrang hranga cheng

te chu in unauna rilru pu a, thinlung hmun khata awm reng turin a chah a, zonun zemawi chhawm nun kawngah theihtawp chhuah zel turin a chah a ni.

Cultural Meet-ah hian YMA Branch hrang hrang telin Mizo hnam lam chi hrang hrang entir niin zai mawi tak tak ngaihthlak a ni a. Tripura Group YMA huam chhungah hian YMA Branch 19 an awm a, YMA member 3000 bawr vel an awm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

BRAHMAPUTRA BOARD MEETING

Mizoram sorkar Irrigation and Water Resources Departmentchuan Brahmaputra Board meeting a thlang a, meeting hi Planning and Programme Implementation Department Conference Hall, Aizawlah neih a ni.

Brahmaputra Board hi Brahmaputra leh Barak lui-a luang lut lui, NE State a lui hrang hrang te, enkawltu, thuneihna sang tak nei a ni a. NE States hrang hrangte bakah Sikkim leh West Bengal-te pawh he Board-ah hian an tel a ni.

Irrigation & Waters Resources Department hian Brahmaputra Board puihnain Springshed Management Pilot Project Daldawk leh Sihphirah a lo kalpui tawh a, heng project te a hi hlawhtling hle a ni. Tunah hian Tlawng lui tuihna ti pung tura hmalaknana DPR siam chu Brahmaputra Board hnuaiah IIT Roorkee in a kalpui mek ai. Luitui lian in leilet ram tha a tihchhiat venna tur proposal IWRD in a thehluh “Anti Erosion Scheme or Flood Management Programme” DPR te pawh duan mek a ni.

Meeting ah hian Aizawl leh Lunglei tui tlan ber Tlawnglui pawimawhna leh a luitui tlem zel tihpun dan tur sawihona, neih a ni a. Sawrkar department hrang hrang leh MZU, CYMA, Save the Riparian, Centre for Environment & Social Justice, Project Save Tlawng te an tel. IIT Roorkee atanga mithiam lo kal te bakah PHED leh Irrigation & Water Resources Dept. atangin paper present ngaihthlak leh sawiho a ni a. He hun hi Chief Minister Pu Lalduhoma’n a hmanpui a ni a ni. He Board meeting hi Chairman Dr. Ranbir Singhan a kaihhruai a ni.

<><><>

DEFENCE MINISTER

Defence Minister Rajnath Singh chuan vawiin khan Hindustan Aeronotics siam Tejas LCA MK1A fighter jet hmasa ber a tlangzarh.He hunah vek hian Defence Minister Singh-a hian HTT-40 trainer aircraft a tlangzarh bawk a. Thusawiin Pu Singa chuan Nashik Division a Sukhoi-30, LCA leh HTT-40 aircraft an siam chu fakawm atih thu a sawi a. Heng tualchhunga siam indo thlawhnate hian ramn mahni intodelh kawnga theihna a neih zia lantirna anih thu a sawi bawk a ni.

<><><>

GUJARAT CABINET

Vawiin khan Gujarat sawrkar cabinet tharah Deputy Chief Minister atan Harsh Sanghvi lakluh a ni.Governor Acharya Devvrat chuan Minister thar 21 te chu Gandhinagar-a Mahatma Mandir-a inkhawm buatsaihah rinawmna thu tiam tirin a lalut a. He hunah hian Chief Minister Bhupendra Patel leh BJP National President JP Nadda te pawh an tel a ni.

<><><>